

17 SEP 1999

Multimedia

NITC TUAN RUMAH MULTIMEDIA ASIA '99 MINGGU DEPAN

KUALA LUMPUR, 17 Sept (Bernama) -- Multimedia Asia `99 (MMA `99) yang dijadualkan pada 22 hingga 26 Sept akan mengumpulkan tokoh-tokoh asing terkemuka dalam industri teknologi maklumat sebagai satu lagi langkah untuk mempromosi Koridor raya Multimedia (MSC).

Mereka yang mengambil bahagian dalam persidangan dan bengkel itu akan juga berpeluang berdialog dengan Perdana Menteri Datuk Seri Dr Mahathir Mohamad pada 22 Sept, kata setiausaha Majlis Teknologi Maklumat Negara (NITC) Tengku Datuk Dr Mohamed Azzman Shariffadeen.

Acara selama lima hari itu di Mines - Malaysia International Exhibition & Showroom - di Sungai Besi dekat sini, dianjurkan oleh NITC dengan kerjasama Multimedia Development Corporation Sdn Bhd (MDC) dan Mimos Bhd.

Dr Mohamed Azzman berkata selain persidangan dan bengkel, MMA `99 juga akan menyediakan satu pameran multimedia pada 23 hingga 26 Sept.

Semasa bercakap kepada pemberita pada majlis penyerahan cek daripada para penaja MMA `99 di sini hari ini, Dr Mohamed Azzman berkata MMA `99 telah menjadi rangkakerja laporan tahunan antarabangsa mengenai kemajuan dalam pelaksanaan MSC dan juga untuk mempromosi projek itu.

MMA `99 akan meletakkan MSC sebagai satu pusat penting dalam rangkaian rakan-rakan dialog untuk membincangkan isu-isu, cabaran dan peluang berhubung kemunculan negara-negara yang berpengetahuan, katanya.

Bengkel yang diadakan akan membincangkan pelaksanaan aplikasi perdana MSC dan isu-isu berkaitan, E-Dagang dan Masyarakat Pintar Subang Jaya 2005. Kira-kira 50 tokoh daripada pengamal industri teknologi maklumat tempatan dan asing serta pakar-pakar akan berkongsi pandangan mereka mengenai pembangunan masa depan MSC.

Antara anggota panelnya ialah Timbalan Gabenor Bank Negara Datuk Dr Zeti Akhtar Aziz, Ketua Pengarah Unit Perancang Ekonomi Datuk Dr Samsudin Hitam, anggota exco Selangor bagi Infrastruktur dan IT Datuk Fuad Hassan dan Ketua Pengarah Jabatan Kerajaan Tempatan Datuk Lokman Hakim Mohamed Jasan.

Kira-kira 80 pempamer telah mengesahkan penyertaan mereka dalam pameran itu.

Dr Mohamed Azzman mengucapkan terima kasih kepada para penaja kerana sokongan kuat mereka terhadap MMA `99. Katanya penajaan setakat ini berjumlah lebih RM150,000.

Southern Bank Berhad dan Celcom (M) Sdn Bhd masing-masing menaja RM50,000, RHB Bank Bhd (RM12,000), Shell Services International Sdn Bhd (RM12,000), Darul Ehsan Multimedia Corporation Sdn Bhd (RM12,000), Astro (RM8,000), Pertubuhan Berita Nasional atau Bernama (RM8,000) dan IRIS Technologies Sdn Bhd menaja sistem pendaftaran.

-- BERNAMA

APG RON